



## MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE POLÍTICA SOCIAL E XUVENTUDE E O CONCELLO DE RIORTORTO, PARA A COLABORACIÓN NO FINANCIAMENTO DO PROGRAMA PARA A DINAMIZACIÓN DAS PERSOAS MAIORES NOS CENTROS VECIÑAIS DO CONCELLO PARA O EXERCICIO 2023

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coas competencias outorgadas ás comunidades autónomas polo artigo 148.1.20 da Constitución española, ten competencia exclusiva en materia de asistencia social, polo que, na súa virtude aprobouse a Lei 13/2008, do 3 de decembro, de servizos sociais de Galicia.

Que a Consellería de Política Social e Xuventude é o órgano superior da administración autonómica ao que lle corresponde as competencias en materia de servizos sociais e consecuentemente, a atención do colectivo de persoas maiores, conforme co Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude.

Que con carácter específico lle corresponde, entre outras, a elaboración das políticas dirixidas ás persoas maiores en aplicación da Lei 13/2008, do 3 de decembro, e da Lei 39/2006, do 14 de decembro, de promoción da autonomía persoal e atención ás persoas en situación de dependencia, en particular no marco desas competencias están comprendidas as funcións relativas ao fomento e á promoción da autonomía persoal, de promoción do envellecemento activo así como e das relacións interxeracionais.

Para a mellor atención das necesidades sociais do seu ámbito territorial, e unha vez garantida a prestación dos servizos sociais comunitarios básicos e demais competencias enumeradas no artigo 60 da Lei 13/2008, de 3 de decembro, os concellos de Galicia poden crear, xestionar e manter servizos sociais especializados, en coordinación coa Xunta de Galicia e de acordo co catálogo de servizos sociais e a planificación correspondente.

A Xunta de Galicia promoverá unha efectiva coordinación e cooperación cos concellos a fin de asegurar a calidade e unha cobertura equilibrada dos servizos sociais en todo o territorio, especialmente no que atinxe á creación e mantemento de servizos sociais comunitarios específicos.

O obxecto do presente convenio é contribuír ao financiamento por parte da Consellería de Política Social e Xuventude das actividades que o Concello de Riotorto ten previsto desenvolver durante o ano 2023, dirixidas á atención de persoas maiores en situación de dependencia, de prevención da situación de dependencia e do agravamento desta, así como de promoción da autonomía persoal destas persoas maiores residentes nese concello, prestándolles os servizos nas antigas escolas rehabilitadas en centros veciñais de que dispón o concello.

1. As actividades programadas atenden a cinco grandes áreas temáticas:

- a) Formación: actividades enfocadas a contribuír á adquisición de coñecementos e destrezas por parte das persoas usuarias.
- b) Difusión: actividades que perseguen achegar a realidade sociocultural da comunidade ás persoas usuarias.
- c) Artísticas: obradoiros cuxo desenvolvemento responderá aos intereses e ás peticións das persoas usuarias.
- d) Lúdicas: actividades de carácter recreativo e de espaxamento como xeito de ocupar o tempo libre.





e) Animación social: actividades que perseguen fomentar a convivencia interxeracional, a participación e a integración na comunidade das persoas usuarias.

2. Dentro das áreas temáticas indicadas desenvolveranse con atención preferente as seguintes actuacións:

a) Charlas sobre a dependencia, que teñen por obxecto dotar de ferramentas a aquelas persoas que teñen ao seu coidado a persoas en situación de dependencia, mediante charlas impartidas por persoal cualificado para o coidado desas persoas.

b) Desenvolvemento de obradoiros de recuperación de memoria, que teñen por obxecto a procura dunha mellora e restauración do nivel cognitivo mediante o traballo individual e grupal das persoas usuarias, favorecendo ao mesmo tempo a interrelación e o desenvolvemento persoal de xeito lúdico.

c) Cursos de informática, que teñen por obxecto favorecer as dinámicas sociais e a cohesión da poboación do rural, de xeito que as persoas que viven en núcleos dispersos acaden unha maior autonomía persoal e unha beneficiosa dinámica de intercambio social.

d) Xerontoximnasia, que ten por obxecto a procura dun axeitado mantemento e mellora das condicións físicas das persoas maiores.

Para o cumprimento da finalidade prevista neste convenio a Consellería de Política Social e Xuventude aportará **corenta mil euros (40.000,00 €)**, que serán imputados á aplicación orzamentaria 13.05.312E.460.0 dos orzamentos xerais da Comunidade Autónoma de Galicia para o ano 2023. Este financiamento terá vixencia desde o momento da sinatura do convenio e ata o 31 de decembro de 2023, con efectos económicos dende o 1 de xaneiro de 2023.

O carácter singular deste convenio en base ás razóns que acreditan o interese social do mesmo, radica no análise das circunstancias demográficas deste concello, da cobertura de servizos sociais públicos actuais e da estimación da poboación maior dependente que demandará un servizo asistencial. Así, o concello de Riotorto actualmente conta cunha poboación de persoas maiores de 65 anos superior ao 45% Polo tanto, tendo en conta as circunstancias particulares deste concello, xunto coa a súa estrutura xeográfica que complica a dispoñibilidade de servizos as veciñas e veciños, artículase este convenio de colaboración de cara a fomentar a realización de programas e actividades dirixidos á atención de persoas en situación de dependencia, de prevención da situación de dependencia e do agravamento desta, así como de promoción da autonomía persoal das persoas maiores residentes nese concello.

As razóns expostas e a particularidade e exclusividade da entidade que desenvolve este programa motiva a concesión de forma directa desta subvención debido á dificultade da súa convocatoria pública, en base aos artigos 19.4,c) e 26 da Lei 9/2007, do 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia. As características da poboación, e as actuacións do programa a subvencionar a través do convenio son conxunturas que dificultan a súa convocatoria pública. Deste xeito, tanto as características da poboación (envellecemento e dispersión xeográfica) que dificultan o desprazamento das persoas usuarias como o feito de que as actuacións do proxecto a subvencionar a través deste convenio se presten nas antigas escolas rehabilitadas en centros veciñais de titularidade municipal, dificultan a súa convocatoria pública.

Asinado dixitalmente en Santiago de Compostela  
O director xeral de Maiores e Atención Sociosanitaria  
Antonio Acevedo Prado

